

**Kalaallit Nunaata eqqaani imartani aningaasaqarnikkut immikkut oqartussaaffigisani
avatangiisit illersorneqarnissaat pillugu inatsisip allanngortinneqarneranik
inatsisissatut siunnersuummik Namminersornerullutik Oqartussat ilaliinissaat pillugu
Inatsisartut aalajangiiffigisassaattut siunnersuut.**

(Nunalerinnermut, Imminut Pilersornermut, Nukissiutinut Avatangiisinullu Naalakkersuisoq)

pillugu

Eqqissisimatitsinnermut Avatangiisinullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq
Inatsisartunut ilaasortaq Knud Mathiassen, attaviitsoq, siulittaasup tullia
Inatsisartunut ilaasortaq Jens Kristian Therkelsen, Siumut
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Pipaluk Lyngé, Inuit Ataqtigiit

UPA2023-mi ulloq 8. november siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

MARPOL-imut isumaqatigiisummi Ilanngussaq VI-mi Kalaallit Nunaata nunap immikkoortuatut nangaassuteqarfigineqarnerata atorunnaarsinneqarnissaanik Inatsisartut ukiakkut 2021-imi ataatsimiinnermini aalajangererat tunngavigalugu siunnersuut saqqummiunneqarpoq. Suliassaqarfik suli tiguneqanngimmat maleruagassat tamatuma kingunerisaanik danskit inatsisaannut ilanngunneqassapput. Taamaattumillu nunani tamalaani pisussaaffiit naapertorlugit issittup imartaani HFO-mik (heavy fuel oil) inerteqquteqarnerup 1. juli 2024-mi ilanngunneqarnissaa Naalagaaffimmi oqartussaasunit angumerineqarsinnaaqqullugu siunnersuutip matuma Kalaallit Nunaannit akuerineqarnissaa pingaaruteqarpoq.

Inatsisissatut siunnersuummik pisinnaatitsissutitalimmik aammalu issittup imartaani HFO-mik atuisoqannginnissaanik assartuisoqannginnissaanillu inerteqquteqarnermik aammalu umiarsuit tankillit qaleriinnik timitallit 1. juli 2029 tikillugu immikkut akuersissuteqarfigineqarnissamut periarfissinneqarnerannik imalimmik nalunaarusiornissami atorneqartussatut naatsorsuutigineqartumik, Naalagaaffimmi oqartussaasut suliaqartut siunnersuummi allassimavoq.

Inatsisip kalaallisoortaata danskisuuatalu sapingisamik annertunerpaamik imminnut naapertuunnissaat qulakkeerniarlugu aammalu siunnersuutip matuma akuerineqarneratigut Kalaallit Nunaata eqqaani imartani aningaasaqarnikkut immikkut oqartussaaffigisani avatangiisinut maleruagassat nutarterneqarnissaannut qulakkeerinneqataajumalluni Kalaallit Nunaanni aammalu naalagaaffimmi oqartussaasut akornanni qanimut oqaloqatigiittoqarsimasoq siunnersuummut nassuiaatini Naalakkersuisut oqaatigaat.

Siunnersuutip Inatsisartunit siullermeerneqarnera

Siunnersuutip imarisai akuersaarluarneqarput immikkoortorlu ataatsimiititaliamit suliarineqartussanngorlugu innersuussutigineqarpoq.

Tusarniaanermi akissutit

Inatsisissatut siunnersuutip Danmarkimi tamanut tusarniaassutigineqarnera Avatangiisinut Ministereqarfiup isumagisimavaa, tamatumalu kingorna inatsisissatut siunnersuut Kalaallit Nunaanni sapaatit akunnerini sisamani tamanut tusarniutigineqarsimavoq. Siunnersuummut akissutit akuersaartumik isummerfigineqartut allassimavoq. Tusarniaaneq pillugu ataatsimiititaliaq oqaaseqaatissaqanngilaq.

Siunnersuutip aningaasatigut kingunerisassai

Inatsisartut Suleriaasianni § 33 imm. 1 naapertorlugu aalajangiiffigisassatut siunnersuutip piviusunngortinneratigut aningaasaqarnikkut allaffissornikkullu kingunerisassai siunnersuutip nassuiaataani allaaserineqassapput.

Taakku 2020 tikillugu siunnersuummi erseqqissumik allaaserineqarput, ataatsimiititaliamilli maluginiarneqarpoq 2029 tikillugu inuiaqatigiinnut kingunerisassat iluanaarutissallu siumut naatsorsorneqarsinnaasimannngitsut, taamaalineranimi sorsuutit umiarsuillu allat naalagaaffimmit pigineqartut atorneqartulluunniit iluanaarniutaanngitsumik naalagaaffimmit atorneqartut, tak., inatsimmi § 3, imm. 4, umiarsuit isumannaatsuunissaat pillugu umiarsuit qulakkeerininnermik suliaqarlutik peqataasut imaluunniit ujaasinernik aamma annaassiniarnernik suliaqartut aammalu umiarsuit Issittumi uuliakoortoqarsimatillugu upalungaarsimanermut suleqataasut minillugit inerteqquteqarnek umiarsuarnut tamanut atuutilersussaavoq.

Ataatsimiititaliap siunnersuummik suliarinninnera

Siunnersuut una MARPOL-imut isumaqatigiisummi Ilanngussaq VI-mi Kalaallit Nunaata nunap immikkoortuatut nangaassuteqarfigineqarnerata atorunnaarsineqarnerata kingunerigaa ataatsimiititaliamit maluginiarneqarpoq, tassungalu atatillugu ataatsimiititaliap isumaliutissiissutaa innersuussutigineqarpoq¹.

Aningaasaqarnikkut Kalaallit Nunaannut kingunerisassat isumakuluutigineqarnerat oqaatigineqartoq ataatsimiititaliamit maluginiarneqarpoq, erseqqilluinnartumilli naatsorsuutigineqarpoq siunnersuutip aningaasaqarnikkut kingunerisinnaasai Naalakkersuisunit eqqumaffiginiarneqartuassasut.

Siunnersuutip kalaallisut qulequtaa kukkuneqartoq ataatsimiititaliamit maluginiarneqarpoq, taamaattumillu ataatsimiititaliaq aappassaaneerinninnissamut allannguutissatut siunnersuummik saqqummiussivoq.

Ataatsimiititaliap inassuteqaatai

- Ataatsimiititaliap isumaqatigiittup siunnersuutip akuerineqarnissaa inassutigaat
- **Siunnersuutip kalaallisoortaata taasisutissartaanut allannguutissatut siunnersuut imaattoq ataatsimiititaliamit isumaqatigiittumit saqqummiunneqarpoq:**

“Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarneranik inatsisissatut siunnersuummik Namminersorlutik Oqartussat ilaliinissaat pillugu Inatsisartut aalajangiiffigisassaattut siunnersuut”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Mala Høy Kúko
Siulittaasoq

Knud Mathiassen
Siulittaasup tullia

Jens Kristian Therkelsen

Mikivsuk Thomassen

Pipaluk Lynge